

ste strete li ha dito più volte: « Oferiti questi mei arzenti a li proveditori e de mi faza come pono; s'io havesse danari io li daria e di le mie page ancor che li mei soldati stentano, fazano come pono et quello li piace ». Conclude, a questi tempi fa per nui tenirlo, etc.

*Sumario di una letera dil dito sier Lunardo Emo, data ivi in campo, a dì 17, hore 4, ricevuta a dì 20 dito.*

Come ozi è venuto in campo missier Francesco primo secretario dil signor vicerè, e ha dito al signor gubernator e proveditori, che eri sera monsignor di Roxa insite di Brexa a hore 11 con questa conclusion: che s'il vicerè voleva lassar insir li francesi, salve le persone, arme e tuta sua roba, diti francesi erano contenti darli la terra, et ch'el signor vicerè havendo in observantia quello Illustrissimo Stato et per lo amor portava a soe signorie, non voleva far nulla senza suo consiglio. Li fo risposto per il gubernator, cussi consigliato con li proveditori e lui, con dirli soa signoria non doveva tuorli con questi modi ma ben tuorli tutti a discretion, perchè Brexa non ne poteva manchar, sichè noi l'havemo potuta haver cussi e non l'havemo voluta tuor, e che saria grande incargo de soa signoria, hessendo zonta con tanto presidio, far quello che nui non havemo voluto far; e che andando tanti francesi salvì di là da' monti, poriano far una massa a gravissimo danno di la Liga; e che l'era ben conveniente che questi poveri exerciti se restaurasse alquanto, et poi soa signoria avea in Franza molto degni capitani, come era Petro Navaro et altri, et la Signoria havea el signor Bortolomeo d'Alviano, domino Andrea Griti, domino Zacaria Contarini etc.: pertanto li pareva a lui che soa signoria non ne doveva far questo torto et vergogna a la Signoria, e li proveditori subgionse a tal opinion molte raxon afermando tal sententia, *tamen* remetendosi a soa signoria. Dito secretario disse, dovendosi atender a molte cosse, era bono expedirla presto tal impresa, perchè una morte o qualche altra cossa che non si pol veder potria disturbar le cosse nostre, e che pur volendo cussi, se dovesse aricordar qualche cossa che facilitasse di haver execution la opinion nostra. Il proveditor Capello li disse, quando sua signoria volesse venir sotto la terra e andar a la Garzeta, seria causa non solamente di farli fin e di averla per forza, con altre raxon. Conclude esso sier Lunardo, la difficoltà tien non sia in questa cossa, ma spagnoli ch'è savii, dicono cussi per far li soi desegni.

Ozi se sollicita qui in campo el butar di le artellarie, et el morter facto è bello.

*Dil dito, a dì 18, hore 6 di note.* Come ozi è zonto la risposta di la Signoria a quanto mandono a dir per Andrea Rosso; volesse Dio ch'el fosse stà exequito avanti. *Item*, ozi è ussito di Brexa 17 cavalli e sono andati nel campo di spagnoli, e questo è certissimo et è stati visti da persone fide degne.

*Sumario di letere di sier Nicolò Michiel proveditor ai Urzi nuovi, date a Quinzan, a dì 16 Octubrio, hore 2. Ricevute a dì 20 ditto.*

Come sempre stà in arme di e nocte, e fa 20 mia de riviera in cavalchate ogni dì, sopra Ojo. Fa fabrichar bastioni e altri repari, e a Ponteviso fa far uno ponte e uno riparo. Ozi ha fatto passar uno napolitano sul cremonese per la via di Ponteviso, el qual va per aver vituarie a li campi di la Liga; quelli di la ripa di là è stati sta note in arme, e zonto lui proveditor questa matina a Ponte Vigo, li vene uno zentilhomo milanese li per nome dil conte Alexandro Sforza capitano zeneral di milanesi, dicendo l'è bon amico di la Signoria nostra, e quantunque altri che potesse e li comandasse etc. lo faria intender prima a li proveditori. Dice ozi è zonto spagnoli. Dio ce aiuti; con tanta nostra pigritia, si ne vien dano, se l'haviamo comprato a danari, nè manca da li provedadori etc. *Item*, mandono ozi uno trombata a far comandamento che li portonari, soldati o altri sia chi se voja i lassino passar il cardinal Sedunense s'il vol passar e le vituarie venissero in campo dil Catholico re e di la Signoria, sotto pena di la forcha. E sguizari sentendo tal crida, 4 di loro passò di qua e volse intender la crida, e letali, persuase el trombata a passar di là di Ojo con uno altro homo da bene, e fu menato a Rebecho dal capitano di sguizari, e visto il mandato, li fe' bona ciera e li disse sguizari esser boni amici di la Signoria nostra, e tene il mandato per mandarlo al cardinal, e si mandò a ricomandar a lui proveditor, e cussi il capitano di Bardolan scrive. Il capitano è a Rebecho, è di Alto Saxo. Scrive esso proveditor dubita soto questo mandato diti sguizari non volesseno passar di qua per danizarne. *Item*, andava tre mia lontan a l'hora predita a sopraveder certe cose, etc. E fa tutte le provision ch'el pol.